

von Wulf Wager

## Sparen mit Zaren



Am Sonndich isch am Alta Schloss z' Stuegert dia Ausstellung "Im Glanz der Zaren" zueude ganga. Als reachter Wirtta-berger muaß ma des gseah han, weil dia Verbindunga ens russische Zarahaus für Württaberg emmer ganz wichtig warat. Mr denk bloß amol an dui Königin Katharina, em Wilhelm I. sei für 's Ländle segensreiche Frau, dia a Zaratochter war.

Also ben i letschta Sonndich mit meira Agetrauta noch Stuegert gfahra, han en dr Schillergarasch parkt ond ben ens Alde Schloss glaufa. Jetzat war do a Warteschlang, dia raus bis uf da Schillerplatz ganga isch. Zwoi Stond Wartezeit! No semmr erscht mol was Essa ganga. Wo mr no drei Stond später wieder zum Schloss komma send, ich dui Schlang no länger gwää. Ja hend dia Leut am Sonndichmiddag nix bessers zom doa, als en Warteschlanga zom standa? Heilixblechle. No hemmr end dr Schillergarasch 11 Euro zahlt und send halt wieder hoim gfahra. Am Donnerschdag no hemmr ons extra freignomma, weil mr denkt hend, dass werktags bestimmt net so voll isch. Also hemmr wieder en dr Schillergarasch parkt ond send nommgloffa. Ond siehe da: Diesmol isch d' Schlang' sogar bis zom Schillerdenkmal ganga. Scheißele. No semmr halt glei wieder zom Auto. Dia drei Minuta hend exakt 3 Euro koschtet.

Ondr schwäbische Sparsamkeitsgesichtspunkt war des an toller Trip. Wemmr überlegt, wieviel mir gspart hend - nämlich 24 Euro Eitritt -, no nehmat sich die 14 Euro Parkgebühra für nix eigentlich zemlich kloiaus. In Summe hemmr emmr no 10 Euro gspart. Also hot sich der Nicht-Ausstellungsbsuach sogar no richtig glohnt.

Bis näggschd Woch'

Ihr

Wulf Wager

